

Awe diasabra 2 di juli 2005... Inicio di campaña

Bin apoye, sostene y diberti dilanti Compleho Deportivo Frans Figaroa na Noord cuminsando pa 7'or di anochi

Invitacion

7:00 pm Grupo musical **FEVER**
Grupo di baile **Kids in Accion**
Grupo di baile **Popcorn Dancers**
Grupo musical **Tipico Noord**
Canto di **Brigitte Croes**
Grupo di baile **Lia Lopez**
9:00pm Presentacion di Jingle
Discurso Ramon Lee
9:15pm Entrenimiento musical di **BMW**
10:15pm Rifa
10:45pm banda musical **BLADE**

Simplemente...

Ramon
Apoye, sostene e si por hopi mas!

Cuento di "servicio dushi servicio" pa otro number

Un cos cu semper mi a bisa, ta cu cada un di nos riba e isla aki, ta un number pa gobierno y su departamentonan. Despues a bin resulta cu clientenan di tur sorto di negoshi tambe - a pesar di e decenas di aña cu nan ta cliente— ta bira un number despues.

Mescos ta cu banconan y varios otro institucion, caminda bo ta cliente fiel, decenas di aña, pero asina cu edad subi, bo no ta conta mas y bo tambe ta bira "un number".

Awor mi a ripara locual semper mi a tende, di tur e tipo di institucionnan, negoshinan, aseguronan y oficianan, cu ta den asunto di auto. Bo ta keda un number tambe.

Aki ta sigui e "cuento di hada" di servicio.

Pa equis motibo bo ta hayabo paralisa pa falta di auto.

Bo mester di un auto urgente diabierna y ta dicidi di tuma contacto cu e compania "Disney Planet" y yega na un arreglo.

PROME BISHITA NA "DISNEY PLANET"

Bo ta papia cu e salesman Superman, cu despues ta pasabo pa e otro salesman, Spiderman "cu no ta haya e comision".

Despues di sinta, poco mas di 1.30 or merdia, bo ta tende: "Awe tardi pa 5.30 or tur cos ta cla!"

Pa 5.30 or bo ta yama pasobra nan no a yamabo, y bo ta bin tende: "bo no por bay cu e auto pasobra mester regla aseguro".

E ora ey bo ta cla pa bira "candela".

"Di con no ta habri boca di merdia cu tin tempo di haci tur esey ainda, y ta awor cu ta cera ta bin cune?"

Kico bo ta haci? Bo ta hayabo obliga di huur un auto cerca un carrental.

Si bo no tin tarheta di credito of placa na efectivo pa paga 500 florin of ta dollar (mi no sa) bo no por huur e auto tampoco.

Bo ta huur e auto te cu dialuna, pa dialuna bo ta cla cu e auto aya.

"DISNEY PLANET TA DRAAI PA LOCO"

Dialuna mainta algo pasa di 9 or bo ta yega Disney Planet atrobe, y salesman Spiderman ta bisabo: "Nan ta traha riba e papelnan, awe tardi tur cos ta cla, entre 3 y 4 or".

Pero caramba! Diabierna merdia "tur cos no tabata cla" prome cu 2 or caba?

E "candela" ta expande den bo culpa.

"Tendemi aki Nansi. Mi no por warda te atardi 3 or pa papelnan bini cla, pasobra banco, unda mi tin mi seguro, ta cera 3.30 or y despues mi no por bay cumpra number tampoco, pasobra Ontvanger tambe ta cera".

Bo ta bin tende otro excusa: "No worry, mi ta bay papia cu Mickey Mouse y pure, pa mas o menos 11 or tur cos ta cla, y lo mi yamabo".

Bo ta cuminza hole e "wega" y pa seguridad bo ta yama compania di huur auto.

Bo ta tene e auto un dia mas.

Atardi 5.30 or bo ta yama atrobe pasobra nan a keda di yamabo (11 or mainta mas o menos) y nada di esey no a wordo haci.

Bo ta bin tende e ora ey: "Bo sa, Donald Duck tin e papelnan pa firma y mañan nan ta cla. Pa seguridad, yama Donald Duck na tal number."

Bo ta yama Donald Duck, y bo ta bin tende cu mester firma e papelnan, pero cu mañan nan ta cla. E mes lo bisa e salesman di esaki.

Bo dialuna ta termina cu e auto cu bo a alquila for di diabierna atardi.

Diamars mainta bo ta pasa atrobe

Algo pasa di 9 or, y ta tende cu "awe tardi tur cos ta regla."

Bo ta haya copia di papel cu bo a firma, y bo ta bay banco; regla aseguro; bay Ontvanger; registra number; bolbe Banco pa e toque final; sali di banco; bay Ontvanger y cumpra bo number.

Awor si bo tin tur cos cla, sperando e "yamada di oro."

Atardi 5.30 or ta yegando y pa seguridad bo ta prolonga e huurmento di auto un dia mas.
Bo ta yama pa sa kico a pasa y ta tende cu ainda Donald Duck no ta cla, pero mañan si.

DESPUES DI RECICLA CARTON PAPEL A CLA

Diaranzon bo ta pasa un biaha mas y ta tende: "E auto ta cla prepara pa bay, e papel no a yega ainda. Mi lo yamabo!" Merdia bo ta warda y nada.

Bo ta yama, y ta ser bisa pa yama Donald Duck.

Bo ta haya Donald Duck y e ta bisabo warda un rato, keda na linea.

Bo ta sinta 8 minuut na linea sin un sonido, y ta cera telefon, y dicidi di bay bo mes.

Atabo ta yega, Spiderman den pura y cu poco miedo, ta yama Donald Duck y mester bin cerca dje.

A bin resulta cu e compania ta keda pabao di Faro di California y e oficina unda mester a busca papelnan cerca Donald Duck, ta mey mey di e isla.

Ta bon cu Spiderman a dicidi di bay cu su cliente "sokete".

Ta bolbe na "Disney Planet" y ta ripara cu ta un rato prome nan a caba di laba auto y prepare.

Pues ta nada cu e "tabata cla" for di Diabierna atardi cu "tur cos ta cla awe tardi!" manera a ser bisa.

Ta haya auto porfin.

"Bay cune y diabierna trece back pa nos pone su "stove" den dje, y pone un "Scotch Tape" pa e motor cu ta huma".

A bay cune, pone number etc. y ta bin ripara un fayó.

Ora di bay San Nicolas, asina cu el a yega 60 km, stuurwiel a cuminza bati riba "ritmo di tambu" y e wielnan riba "ritmo di tumba.."

Diahuebs cu a bolbe un rato mainta pa trece papelnan, a conta e "grote heer", "Kapitein Haddock" cu na e momento aki e auto ta "15 ora cerca su doño nobo. Prome cu bira 24 ora tin cu reclama cu e ta core manera orquesta Bati Bari."

—"Tin cu pase den "Play Station".

"Mañan e tin cu bin pa tal y tal"

—"Lo tira un bista riba dje pa e funciona manera un computer".

WEGA DI CACO SCONDI

Bo ta core hibe diabierna mainta pa su "stove" y pa su "Scotch Tape" y pa nan pase den "Play station" y ta tende: "Asina e ta cla mi ta trece pabao, of yamabo pa buske!"

Mainta a pasa, merdia a pasa y atardi a drenta.

Pa 5.30 or no a trece auto, ni a yama, y ta dicidi di bay abao.

Ora yega, Spiderman ta den porta: "Tur cos ta cla. Bay parabá na "Disney Moon" y bisa nan cu mi a mandabo busca e auto".

Bo ta yega Disney Moon, pasa unda Popeye a bisabo, y topa cu juffrouw "Olive".

"Meneer, e stove no a bay aden pasobra mester busca e caha na deposito. No a traha riba e tambunan pasobra henter dia tabata mucho yen di trabao. Nos lo yama pa laga sa ki dia pa trece".

—"Pero juffrouw, what about e Scotch Tape?"

"Mi no sa di esey, nan no a bisa nada di esey".

—"E stove y e Scotch Tape tabata e problema y e orquesta di tambu a bin despues".

Bo ta sali bay cu bo auto y mester warda te ora cu tur cuero di tambu kibra pa nan yamabo y bo tende: "Bo no mester a bati e tambu. Awor si bo a coi awa y mester paga un dineral. Ta bo mes falta."

Casi sigur ta cu ora bo haya e Scotch Tape, esaki lo no funciona pasobra e lijim a bira bieu y no ta pega mas.

E "stove" cu mester bin den caha lo por resulta "stove recicla" tambe.

Kico nan tin cunes? Nan ta haya nan placa toch, di otro Arubiano "pen bieu". Ta un number bo ta pa nan.

Juby Naar